

Mayorren hitzak Konstituzioak jasotzen eta Gobernuak babesten dituela dio Piquek

PP eta EAJren arteko harreman parlamentarioetan ez duela eragina izango dio

Agentziak / Madril

Jaime Mayor Orejak egindako adierazpenek Espainiako Gobernuaren eta Konstituzioaren babesa dutela adierazi zuen atzo Josep Piquek.


Espainiako Gobernuak bozeramaileak Xabier Arzalluzen esanei erantzunez baieztatu zuen hori, Ministroen Kontseiluaren osteko prentsurrekoan. Ildo horretan, EAJko lehendakariaren hitzak «esperpentikoak» zirela

adierazi zuen, eta gertatutakoak ez duela eraginik izango EAJ eta PPren arteko harreman parlamentarioan. Piquek esan zuenez, EAJk duela hila-bete batzuk utzi zion PPri babesa emateari.

XABIER ARZALLUZEK atzo egindako adierazpenek Espainiako Gobernuaren berehalako erantzuna ekarri zuten. Arzalluzek goizean iragarri zuen EAJk harreman guztiak hausten dituela Jaime Mayor Orejarekin, Barne ministroak Guardi Zibilaren ekitaldi batean egin zituen adierazpenengatik. Ildo horretan, EAJko buruzagiak eskatu zion Espainiako Gobernuari azal zezala ea Mayor Orejaren hitzak bere egiten zituen. Espainiako Gobernuak bere bozeramailearen bidez eman zion erantzuna Arzalluzi: Barne ministroak Gobernuaren babes osoa duela.

Josep Piquek esandakoa-
ren arabera, Mayorren adierazpenek «Espainiako Gobernuaren, zentzu onaren eta Konstituzioan jasotako Espainiako esparru juridiko-politikoaren» babesa dute. Beraz, Madrilgo Gobernuak ez zuen inolako zalantzarik eduki Mayor Orejaren hitzak bere gain hartzeko.

Piquek, bestalde, adierazi zuen ez dituela «ongi ulertzen» Arzalluzen hitzak, «harremanak haustea harreman diplomatikoei edo harreman pertsonalei dagokien esapidea baita». «Eta are gutxiago uler daiteke Arzalluzek esandakoa, Barne ministroak Guardia Zibilaren zereginari buruz adierazitakoa Konstituzioak ezartzen dion zeregina denean», gaineratu zuen.



JOSE MARIA PASTOR / EFE

Manuel Pimentel eta Josep Pique, atzo Ministro Kontseiluaren ostean eskaini prentsurrekoan.

Ildo horretan, Josep Piquek adierazi zuen Xabier Arzalluzek esandakoa «esperpentikoak» dela. Espainiako Gobernuak bozeramaileak adierazi zuen gertatutakoak PP eta EAJren arteko harreman parlamentarioetan ez duela inolako eraginik izango. «Izan ere, ezin esan daiteke EAJren eta PPren artean elkarlan parlamentarioa dagoenik, hitzaren definizio eta esanahi zehatza kontuan hartuta. Ez dago babes sistematikorik, interesen arabera babes puntual eta eztabaidatuak

baizik», gaineratu zuen, aditzera emanez EAJ eta PPren arteko akordioa aspaldian hautsita dagoela.

PP eta EAJren arteko aldentze hori hilabeteetako gauza dela adierazi zuen Piquek, eta EAJk ETaren suetenaz geroztik daraman «estrategia politikoaren» ondorio dela. Esan zuenez, EAJk hilabeteotan PPri babesa eman dionean «egonkortasun politikoaren eta autogobernuaren izugarritzko garapenaren mesedetan baino ez dio eman».

Mayorrek ez omen zuen halakorik esan

Barne Ministeriotik diotenez, Arzalluzek «desitxuratu» egin du Mayor Orejak esandakoa. «Ez da lehen aldiz Arzalluzek errealitatea desitxuratu eta Barne ministroari buruz gezurra esaten duela», dio Ministeriotik Efe informazio agentziari bidalitako komunikatuak. Bertan dioenez, Mayor Orejak ez du inoiz esan Guardia Zibilaren zeregina «Espainia euskal fronte abertzaletik babestea» dela.

Herri Batasunako mahaikide guztien argazkiak zeuden CESIDek Gasteizen erabili etxebizitzan

■ Iruinen aburuz, «baieztatu egiten da kontrol politikoa»

Agentziak / Gasteiz

GASTEIZEN CESIDek ustez entzuketak egiteko etxebizitza ikuskatu zuten ostegunean. Diligentzia judizial horretan izan zen Iñigo Iruin akusazioko abokatua, eta hark azaldu zuenez, etxebizitzan Herri Batasunako Mahai Nazional espetxeratuaren zein haren ordezkorekin kide guztien argazkiak zeuden.

Iñigo Iruin akusazioko abokatuaren ustez, «argi dago kontrola politikoa zela, eta ez Gobernuak eta defentsak zioten bezala antiterrorista». Iñigo Iruinek azaldu zuenez, Herri Batasunako kargu publikoen ekintza politikoaren segimentua egiten ari ziren».

Bestalde ostegunean etxebizitzaren jabeak eta haren semeak ere deklaratu zuten. Biek etxebizitzan egoten zen pertsonetako bat Victor Castaran sarjentua zela esan zuten. Castaran jada inputatuta dago auzi honetan. Hala-ber, jabearen semeak berretsi zuen etxebizitzara lehen aldiz sartu zenean bertan topatu zituela hainbat argazki, bai eta hegazkin txartel bat ere, beste inputatu baten ize-nean dagoena.

Diligentzia hauek defentsak egin errekurtsioen ondorio dira. Izan ere, etxebizitzaren ikuspena egin zen jada 1998ko martxoan, baina orduan defentsa eta akusazioak ezin izan ziren bertan egon, kasua sekretupean baitzegoen.